



PARS POSTERIOR

DE PECCATO VENIALI

QUAEST. LXXXVIII - LXXXIX.

Fides catholica docet, dari peccata venialia, id est, quae suapte natura ita levia sunt, ut non separent hominem a Deo, nec sint per se aeterna damnatione digna. Haeretici autem Calvinistae hanc Ecclesiae doctrinam improbant; improbavit et Baius, cuius propositio vigesima ex octoginta sex damnatis a S. Pio V, sic habet: « Nullum est peccatum ex natura sua « veniale, sed omne peccatum meretur poenam aeternam » (1). Prae primis igitur tractanda quaestio *an sit*, pro qua statuitur sequens assertio:

THESIS VIII.

(QUAEST. 89 - ART. 2).

Per lignum, fenum et stipulam, quae 1 Cor. III, 12, dicuntur iuxtaponi fundamento spiritualis aedificii, intelligi debent venialia peccata; quapropter recte damnata est in Baio propositio asserens nullum esse peccatum ex natura sua veniale, sed omnem culpam mereri poenam aeternam.

De venialibus peccatis plura equidem exstant Scripturae testimonia, puta Prov. XXIV, 16: *Septies cadet iustus et resurget*; et Eccl. VII, 21: *Non est homo iustus in terra qui faciat bonum et non peccet*; et 1 Ioan. I, 8: *Si dixerimus quoniam pec-*

(1) Enchirid. n. 900.

catum non habemus, ipsi nos seducimus, et veritas in nobis non est. Ubique enim insinuat peccatum quo quis a statu iustitiae non decidit, et ex consequenti, reatum poenae aeternae non incurrit; et hoc est sine dubio veniale peccatum.

His tamen praetermissis, unus principalis et vere classicus locus est, in quo simul cum veritate venialium peccatorum proponitur dogma purgatorii (1). Habetur autem in 1 Cor. III, 11-15: *Fundamentum aliud, inquit, nemo potest ponere, praeter id quod positum est, quod est Christus Iesus. Si quis autem supraedificat super fundamentum hoc, aurum, argentum, lapides pretiosos, ligna, fenum, stipulam, uniuscuiusque opus manifestum erit; dies enim Domini declarabit, quia in igne revelabitur, et uniuscuiusque opus quale sit, ignis probabit. Si cuius opus manserit quod supraedificavit (2), mercedem accipiet. Si cuius opus arserit (3), detrimentum patietur; ipse autem salvus erit, sic tamen quasi per ignem.* Qua in re, considerandum est, quid sit fundamentum, et qui sint supraedificantes; itemque quid aurum, argentum, cum caeteris hic recensitis; quis demum dies Domini, quis ignis, et quae per ignem salvatio.

Porro, concordanti sententia statuunt interpretes, graeci patriter et latini, fundamentum de quo loquitur Apostolus, esse fundamentum fidei in Christum; supraedificantes vero esse fideles, huic fundamento imponentes vel opera bona et viva, aeterna mercede remuneranda, quae per aurum et argentum

(1) Obiter hic observabis, qua ratione cum venialium peccatorum existentia connectatur dogma purgatorii. Non quod, ut multi de vulgo existimant, sola venialia in purgatorio igne puniantur; quin imo, puniuntur vel maxime mortalia, quae ante terminum viae in gratuita iustificatione fuerunt iam remissa, nondum tamen extincto remanente temporalis poenae reatu, de quo supra in corollario. At vero, transitoria purgatorii poena non competit mortali peccato, nisi aliqua suppositione facta, id est, si iam sit ablata eius macula per poenitentiam et Dei misericordiam; peccato autem veniali debetur antecedenter et absolute. Recte ergo Scriptura connectit dogma purgatorii cum reatu venialium peccatorum, sicut connectit dogma inferni cum reatu mortalium, utrobique respiciens id quod est per se, sive id quod propriam consequitur utriusque peccati rationem et naturam.

(2) Huiusmodi est qui supraedificavit aurum, argentum, et lapides pretiosos.

(3) Huiusmodi est qui supraedificavit lignum, fenum, et stipulam.

et lapides pretiosos significantur, vel opera quaedam mala, nomine ligni et feni et stipulae designata. Nunc autem Chrysostomus et qui ipsum sequuntur, volunt haec mala opera esse peccata mortalia, fundamento *fidei mortuae* supervenientia, eademque aeterno igne punienda. Sed huic intellectui *evidenter* obstat illud quod postea sequitur, cum supraedificans ligna et fenum et stipulam, dicitur fore salvus quasi per ignem. Quod enim Graeci illi censent talem dici salvum per ignem, quia quamvis in gehennam mittendus, nunquam tamen consumetur, sed perpetuo in igne servabitur, vel, ut aiunt, superstes erit, recens semper ad poenam (1): haec, inquam, interpretatio praeter omnem fidem est, et omnem probabilitatem. Sane vero usus loquendi id non habet, « nec unquam Scriptura sic loquitur, ut salvus dicatur qui superstes est in malis; quin potius tales, et vulgo, et more Scripturae, periisse

(1) « *Detrimentum patietur, ecce unum supplicium. Ipse autem salvus erit, sic tamen quasi per ignem, ecce secundum.* Hoc autem vult significare: non sic ille peribit ut opera, ad nihilum redactus, sed manebit in igne. Salutem itaque hanc rem vocat, sed non simpliciter; adiecit enim, *quasi per ignem.* Nam nos quoque solemus dicere, in igne salvus est, de iis quae non comburuntur, nec statim in cinerem abeunt. Ne ergo, quia ignem audisti, putes eos qui comburuntur, in nihilum redigi. Si vero tale supplicium salutem vocat, ne mireris; solet enim etiam in iis quae male sonant, pulchris uti nominibus, et in bonis, contrariis. Verbi gratia, captivitatis nomen malae rei nomen esse videtur; sed in re bona illo usus est Paulus, dicens: *In captivitatem redigentes omnem intelligentiam ad obedientiam Christi.* Et in re mala, bene sonante nomine usus est, dicens: *Regnavit peccatum, quanquam nomen regni potius bene sonet.* Sic et hoc loco cum dicit, *salvus erit, nihil aliud quam augmentum supplicii indicavit, ac si dixisset: Ipse autem manebit in aeternum cruciatus.* Ita Chrysostomus, Hom. 9 in epist. 1 ad Cor. — Quanto melius Augustinus, Enarr. in Psalm. 37, n. 3, orat Deum: « Ut in hac vita purges me, et talem me reddas, cui iam emendatorio igne non opus sit, propter illos qui *salvi erunt, sic tamen quasi per ignem.* Quare, nisi quia hic aedificant supra fundamentum, ligna, fenum, stipulam? Aedificarent autem aurum, argentum, lapides pretiosos, et de utroque igne securi essent; non solum de illo aeterno qui in aeternum cruciaturus est impios, sed etiam de illo qui emendabit eos qui per ignem salvi erunt. Dicitur enim: *Ipse autem salvus erit, sic tamen quasi per ignem.* Et quia dicitur, *salvus erit, contemnitur ille ignis.* Ita plane, quamvis salvi per ignem, gravior tamen erit ille ignis, quam quidquid potest homo pati in hac vita, etc. » — Cf. etiam Enarrat. in Psalm. 80, n. 20 et seq.

« dicuntur; quo genere argumenti commentarium hunc Graecorum, Patres Latini in Concilio Florentino refutarunt » (1).

Manifesta igitur cogit nos necessitas, ut per lignum et fenum et stipulam intelligamus peccata quae, cum fundamentum charitatis sive *fidei vivae* non destruant, ex sese poenam merentur, non aeternam, sed temporalem, et pro tanto venialia appellantur. « Sicut enim, inquit S. Thomas, huiusmodi congregantur in domo, (videlicet lignum, fenum, etc.), et non pertinent ad substantiam aedificii, et possunt comburi aedificio remanente: ita etiam peccata venialia multiplicantur in homine, manente spirituali aedificio; et pro istis patitur ignem vel temporalis tribulationis in hac vita, vel purgatorii post hanc vitam, et tamen salutem consequitur aeternam ». Rationem vero convenientis distributionis in ternario ligni, feni, et stipulae, assignans idem Angelicus in IV, D. 21, q. 1, a. 2: « Dicendum, ait, quod venialia charitati adiuncta possunt per aliquam poenam consumi, et ideo convenienter secundum metaphoram signantur illa quae per ignem consumuntur. « Et quia quanto aliquod peccatum est gravius, tanto difficilius purgatur, in peccatis autem venialibus invenitur alterum altero gravius, ideo convenienter eorum diversitas signatur per diversitatem eorum quae facilius et tardius consumuntur ab igne. Et quia perfectio cuiuslibet quantitatis ternario comprehenditur, propter principium, medium, et finem, ideo triplex differentia ponitur, quia quaedam sunt gravissima in genere venialium, et difficillime purgabilia, et haec per lignum signantur; quaedam minima, quae per stipulam; quaedam media, quae per fenum signantur ». — Habes itaque legitimam huius loci expositionem, quae etiam egregie confirmatur, praescindendo a quacumque opinione particulari, tam circa personas vel opera quae directe in praesenti respicit Apostolus, quam circa ignem vel diem Domini de quo terret Corinthios.

In primis nil refert an *directe* agatur de omnibus indiscriminatim culpae quae superveniunt fundamento fidei per charitatem formatae, non destruendo illud; an specialiter, magis

(1) Estius, in cap. 3, ep. 1 ad Cor.

inhaerendo contextui, de defectibus qui a praedicatoribus admittuntur in ipso praedicandi ministerio, veluti si doctrina eorum sit, non quidem haeretica aut perniciosa, sed minus sincera minusque solida, humanis ac philosophicis opinionibus admixta plus satis, si curiosa magis quam utilis, si vana quadam oblectatione mentes christianas occupans, ut contingit in iis qui studio placendi plus aequo indulgent. Nihil, inquam, hoc ad propositum refert, cum sit par atque eadem de uno genere venialium ratio, ac de aliis quibuslibet. Caeterum, omnino dicendum videtur quod Paulus, occasione accepta a praedicatoribus de quibus ab initio epistolae sermo fuit, tradidit generalem doctrinam circa peccata quae substantiae charitatis non opponuntur, adeoque salutem non impediunt, sed transitorii sive purgatorii ignis reum hominem efficiunt; quippe inter eos magistros de quibus Corinthii inter se contendebant, inveniebantur nonnulli qui pro humana fragilitate, affectus minus bene ordinatos miscebant zelo annuntiandi Christum.

Multo minus scire interest, de die Domini de quo vers. 13 dicitur, *uniuscuiusque opus manifestum erit, dies enim Domini declarabit*, etc., an scilicet hoc vocabulo designetur particulare iudicium, vel potius universale. Quanquam rectius ad litteram intelliges ultimum adventum et extremae conflagrationis ignem, iuxta illud 2 Petr. III, 12: *Expectantes et properantes in adventum diei Domini, per quem caeli ardentis solventur, et elementa ignis ardore tabescent*. Ubique enim in Scriptura dies Domini pro universali iudicio accipitur, quando nimirum apparebit Dominus in gloria et maiestate et supremo suo posse. Et nunc quidem dies hominis peragitur, quamdiu homini permittitur praevalere adversus Christum; tunc autem, non amplius hominis, sed Domini erit dies, cum ipse venerit ponere inimicos suos scabellum pedum suorum, et adimplere figuram Melchisedech: primum quidem qui interpretatur rex iustitiae, deinde rex pacis, imo vero, ideo rex pacis, quia ut verus iustitiae rex, sub immobili lege regni caelorum tranquillitatem ordinis in toto universo instaurabit, unumquemque componendo in loco et gradu suo. — Sed, dicit aliquis, si dies Domini in igne revelandus, significat ad litteram ultimum iudicis adventum, et qui ante ipsum praecedet conflagrationis ignem, quid tan-

dem pro dogmate purgatorii praesens facit testimonium, cum iuxta Ecclesiae fidem, purgatorium animarum nunc existat, et in consummatione saeculi debeat desinere? Ad hoc respondeo, morem esse Scripturae ut de hominibus loquatur, quasi viuentes eos omnes deprehensus esset dies Domini; itemque ut futuram vindictam recapitulet in igne quo tanquam instrumento iustitiae suae Christus iudex tunc utetur. Et ille quidem ignis cunctos probabit qui tunc vivi erunt super terram, sed eos tantum purgabit quos quadantenus impuros inveniet; si quos autem omnino puros et antea purgatos, hos illaesos transmittet ad regnum; impios vero et Dei inimicos corripiet, inflammabit, cruciabitque in aeternum, sicut post Psalmistam expressius de eo scribit Apostolus, 2 Thessal. I, 7-10: *In revelatione Domini Iesu de caelo cum angelis virtutis eius, in flamma ignis dantis vindictam iis qui non noverunt Deum, et qui non obediunt Evangelio Domini nostri Iesu Christi, qui poenas dabunt in interitu aeternas a facie Domini, et a gloria virtutis eius, cum venerit glorificari in sanctis suis, et admirabilis fieri in omnibus qui crediderunt.* Iam vero, ut bene ratiocinatur Estius in c. 3 epist. 1 ad Cor., « sicut Scriptura saepe ex generali iudicio « vult intelligi particulare, et ex die novissimo quo omnes iudicabuntur, vult intelligi diem mortis uniuscuiusque, quo « singuli iudicantur; ita ex igne qui faciem Christi iudicis « antecessurus est ad universale iudicium, et purgaturus quid « quid illo tempore purgandum restabit, intelligendum relin- « quit ignem aliquem, quo statim post hanc vitam ad pur- « gandas animas particulare iudicium exerceatur. Itaque hac « ratione, poena purgatoria animarum ex hoc Pauli loco bene « et solide colligitur. Sed cur Apostolus, omissa mentione « purgationis animarum quae fit medio tempore, loquitur tan- « tum de igne extremi iudicii? *Primum*, quia non de animabus « solis, sed de hominibus anima et corpore constantibus sermo « erat. Unde et universalis iudicii multo saepius mentionem « habemus in Scripturis, quam particularis; quod nimirum de « iudicio quo iudicabuntur homines, agant Scripturae. *Deinde*, « quia solet Apostolus de se et aliis viventibus sic loqui, tan- « quam adventus Domini ad iudicium, ipsos viuentes esset « occupaturus. Unde dicit cap. 15 huius epistolae: *Mortui re-*

« *surgent incorrupti, et nos, id est, qui viuentes reperiemur, « immutabimur; et 1 Thessal. IV, semel et iterum, nos qui « vivimus, qui residui sumus, etc.* ». — Uno igitur verbo, cum eiusdem conditionis sint in ordine ad divinam iustitiam, tam ii qui nunc moriuntur, quam illi quos vivos deprehendet ultimus adventus: quemadmodum ii qui iuxtaposita habebunt fundamento fidei vivae lignum et fenum et stipulam, tunc salvabuntur, sic tamen quasi per ignem, ita et nunc. Unde, etsi sermo Apostoli non respiciat directe ignem purgatorium qui nunc est, indirecte tamen et ex consequenti ipsum adstruit, aut verius ex concomitanti; intendit enim instruere fideles de poena quae propter leves culpas eos manet, transfigurando omnes in personam eorum, quibus, non communis mors, sed ipsa saeculi consummatio finem viae afferet.

Haec tamen de purgatorio animarum velut obiter dicta accipiantur, cum disputatio ista non sit huius loci; sufficit enim, si de veniali peccato Scripturae sententia dubitare nos non sinat. Sed nunc, post quaestionem *an sit*, exponendum superest *quid sit*, ut sequitur.

THESIS IX.

(QUAEST. 88, ART. 1-2).

Peccatum veniale, si etymon vocis attendatur, nihil aliud est quam peccatum ex sese condonabile; si autem consideretur ratio impositionis nominis, est actio moraliter mala quae non tollit principium ordinis per aversionem a Deo fine ultimo, et pro tanto dici potius debet praeter, quam contra legem aeternam, sive sit venialis ex genere suo, sive ex imperfectione actus tantum.

§ 1.

Quoad etymon vocis, evidens est quod veniale dicitur a venia. Tripliciter autem, ut docet S. Thomas, potest aliquod peccatum a venia denominari. — Uno quidem modo, quia iam consecutum est veniam, sicut cum Ambrosius dicit quod

mortale peccatum fit per poenitentiam veniale; sed haec est denominatio pure extrinseca, quae sumitur ab eventu. — Alio modo peccatum potest denominari veniale, quia habet in se causam minoris punitionis, propter circumstantias attenuantes quae in eo considerantur; et sic, peccata mortalia quae ex infirmitate sive passione fiunt, quandoque dicuntur venialia, non quidem simpliciter, sed secundum quid, et comparative ad ea quae ex certa malitia procedunt. — Tertio tandem modo peccatum denominatur veniale, quia, *quantum est de se*, habet causam veniae totalis, utpote non aeterna, sed temporaria tantum poena dignum; et hoc est peccatum veniale simpliciter, conditum contra mortale, de quo in praesenti loquimur.

§ 2.

Verum *venialis* nomen desumptum est ab aliqua proprietate quae consequitur essentiam talis peccati, et non constituit eam. Non enim ideo est tale peccatum, quia transitoria tantum poena ei debetur, sed omnino e converso. Inquirendum igitur superest, quid speciale habeat peccatum hoc, secundum suam essentiam consideratum, ut ex sese, poenae aeternae reatum non inducat. Quaestio autem facile solvitur ex principiis superius traditis de peccato mortali. Etenim, « cum peccatum « sit quaedam infirmitas animae, inquit Angelicus in praesenti, « peccatum aliquod mortale dicitur ad similitudinem morbi, « qui dicitur mortalis ex eo quod inducit defectum irreparabilem, per destitutionem alicuius principii. Principium autem « spiritualis vitae quae est secundum virtutem, est ordo ad « ultimum finem, qui quidem si destitutus fuerit, reparari non « potest per aliquod principium intrinsecum, sed solum per « virtutem divinam... Defectus ergo ordinis ultimi finis non « potest per aliquid aliud reparari quod sit principalius, sicut « nec error qui est circa principia; et ideo huiusmodi peccata « dicuntur mortalia, quasi irreparabilia. *Peccata autem quae habent inordinationem, conservato ordine ad ultimum finem, reparabilia sunt* (per principium interius), *et haec dicuntur venialia.* « Tunc enim peccatum veniam habet, quando reatus poenae

« tollitur, qui cessat, cessante peccato (1) ». Et eadem habet S. Thomas, de Malo, Quaest. 7, a. 1.

Est igitur de essentiali ratione venialis peccati, ut deordinationem moralem habeat citra aversionem a Deo. Quod autem, actio aliqua, etsi irreferibilis in Deum, nihilominus aversionem a Deo non contineat, contingit dupliciter. — Uno modo ex parte subiecti, id est, ratione imperfectae voluntarietatis, quando actus ex plena deliberatione non procedit. Et re quidem vera, voluntas non avertitur a Deo, nisi creaturae adhaerendo, vel signate vel exercite, ut fini ultimo; porro conversio ad aliquid ut ad finem, nusquam esse potest per actum non plene deliberatum. Finis enim ultimus se habet in operabilibus sicut primum principium in intelligibilibus; sed in intelligibilibus, non tenetur aliquid ut primum principium, quamdiu non habetur de eo nisi formidolosa vel opinativa aestimatio; et similiter, in operabilibus, quisquis non fertur in aliquid nisi actu imperfecte voluntario, nondum ei adhaeret tanquam supremo diligibili, quod sit ratio caetera diligendi. Impossibile igitur est ut motus voluntatis semideliberatus vim unquam habeat destruendi subiectionem ad Deum ut ad finem, de qua subiectione dicitur: « Diliges Dominum Deum tuum « ex toto corde tuo, et in tota anima tua, et in tota mente « tua ». — Alio item modo contingit peccatum esse absque aversione a Deo, ratione scilicet obiecti, quod tantummodo praeter, et non contra ordinem finis ultimi est, omnia intelligendo iuxta ea quae superius in Prolegomeno declarata sunt (2). Qui enim aliquid vult quod est solum praeter aliquem finem, et aliunde non ordinat illud ad finem oppositum, nequaquam se a praedicto fine avertit, tametsi aliquid faciat quod nequit ad ipsum referri, ac per hoc, verissimam continet deordinationem, si de eo fine sermo sit ad quem nos et omnia nostra referre tenemur. — Ast:

(1) *Qui cessat, cessante peccato*: id est, qui aliquando saltem cessare debet, cessante culpae reatu; nam, ut dictum est, necessaria conditio aeternitatis poenae est aeterna permanentia perversionis ordinis, quam peccati actus induxit.

(2) Vide supra, pag. 33 et seq.

Contra praedicta obiicitur primo: *Peccatum veniale in iis etiam esse potest qui sunt gratia et charitate destituti; ergo propria eius ratio non in hoc consistit, quod deordinationem habeat, conservato ordine ad ultimum finem.*

Respondeo quod, cum dicitur *conservato ordine ad ultimum finem*, intelligendum est ordinem illum non destrui ex vi peccati venialis, quo non obstante, semper permanet et conservatur, quando est. Si autem aliunde destructus supponatur, non ideo variatur intrinseca levis culpa ratio; nam etsi haec culpa de facto non componatur cum manente fundamento charitatis, ex sese tamen cum eo componi potest. Hinc peccatum veniale, tam in iustis quam in peccatoribus est, quantum in peccatoribus sit *per accidens* ab intrinseco irreparabile, et *per accidens* etiam in inferno puniatur poena aeterna, ut in sequenti propositione dicitur; quippe, ex mortalis peccati coexistentia impeditur, aut verius ligatur quodammodo venialitatis proprietate. Quare, ut distinctiva venialis peccati ratio epurata appareat ab eo quod in ipso non est nisi *per accidens*, seu propter aliud cui coniunctum invenitur, solet veniale considerari ut *de facto* coexistens cum fundamento charitatis, iuxta illud Apostoli: *Si quis autem supraedificat super fundamentum hoc..., ligna, fenum, stipulam..., detrimentum patietur; ipse autem salvus erit, sic tamen quasi per ignem.* Unde etiam vides, doctrinam S. Thomae circa differentiam qua mortale a veniali distinguitur, ex purissimis Scripturae fontibus fuisse depromptam.

Obiicitur secundo: *Quisquis quacumque ratione, actu saltem deliberato peccat, praefert voluntatem suam voluntati Dei, adeoque amat aliquid supra Deum. Sed amare aliquid supra Deum, est adhaerere creaturae ut summo diligibili, ac per hoc, non amplius subiici Deo ut ultimo fini. Ergo omne peccatum ex natura sua continet aversionem a Deo.*

Respondeo: **Dist. mai.** Quisquis quacumque ratione peccat, praefert voluntatem suam voluntati Dei, id est, praefert voluntatem suam creatam voluntati increatae quae est ipse Deus, **neg. mai.** Id est, praefert rem a se concupitam rei a Deo praeceptae, **subdist.** Ita tamen ut res praeceptae, vel sit de genere eorum sine quibus recte servatis principium ordinis, quod est charitas super omnia Deo adhaerens, amplius non

stat, vel e contra adhuc consistere potest, (prout scilicet transgressionis obiectum, aut contra, aut tantum praeter ordinem finis existit), iterum **conc. mai.** Alias **neg.**, et concessa minore, nego consequentiam.

Sane vero, cum homo peccans dicitur voluntatem suam voluntati Dei praefere, voluntas Dei evidenter hic sumitur pro re quam praecipit Deus. Videndum igitur est, cuiusmodi praeceptum imponatur, ut si quidem sit sub aversione a Deo, ponatur homo in necessitate eligendi inter Deum et rem prohibitam, unumque alteri praefereendi, ac per consequens, vel abstinendi ab eo quod prohibetur, vel adhaerendi commutabili bono ut fini, Deo derelicto. Si autem praeceptum sub aversione a Deo non sit, tunc nequaquam ponitur homo in necessitate eligendi inter unum et alterum finem; imo vero, adhuc potest Deum diligere super hanc ipsam rem quam inordinate appetit, quia actio eius talem compatitur animi dispositionem, qua, si res prohiberetur ut contra ordinem veri ultimi finis existens, illam non vellet, sed magis eligeret eius emolumento carere, quam Dei amittere amicitiam. Et sic etiam contingit in humanis, quod aliquis nollet pro ulla re mundi offendere amicum offensione separativa ac per se dissolvente foedus amicitiae, tametsi quandoque faciat ea quae amico displicent; tunc enim non praefert amico id quod appetit praeter amicitiae ordinem, sed paratus esset illud relinquere, si aliter retineri amicitia non posset; in huiusmodi ergo, offenditur amicus, non simpliciter, sed secundum quid. Haec nunc applica proposito, et cum proportionem ratiocinare. — Ast, nondum omnino quiescit animus, nam:

Obiicitur tertio: *Necesse est ut omnia quae appetit homo, appetat propter ultimum finem qui est consummatum bonum eius, ut dicitur in 1-2, q. 1, a. 6; ergo et obiectum venialis peccati propter ultimum finem semper appetitur. Sed non potest appeti propter ultimum finem qui Deus est, cum sit ad Deum irreferibile; ergo propter ultimum finem qui est creatura. Si autem propter ultimum finem qui est creatura, statim consequitur quod in omni peccato inducitur finis Deo oppositus, vel aliis verbis, quod nullo pacto aliquis possit peccare, conservato ordine ad Deum sub ratione ultimi finis.*

Respondeo quod de ultimo fine loqui possumus dupliciter: uno modo, secundum rationem abstractam ultimi finis; alio modo, secundum id in quo ratio ultimi finis invenitur. Quantum igitur ad rationem abstractam ultimi finis, sicut in ultimo fine omnes conveniunt, ita in omnibus illum appetunt, ad eumque referunt omnes actus suos; hoc enim nihil aliud dictu est, nisi quod semper appetimus nostram perfectionem adimpleri. At quantum ad id in quo praedicta ratio ultimi finis reponitur, non est necesse ut omnis actio nostra ad aliquid determinatum referatur; sed potest esse quod aliquid velimus, non ut summum appetibile, ex solo desiderio boni in genere, parati interim illud relinquere, potius quam aliud principalius amatum amittere. Et hoc ex duobus provenit: Primo ex hoc quod in obiecto apparet aliqua bonitas absoluta, ratione cuius potest terminare appetitum voluntatis ut finis intermedius. Secundo ex hoc quod intellectus noster in praesenti statu unionis ad corpus, modum habet cognoscendi abstractivum et discursivum, quem consequitur proprius modus operandi per voluntatem. — Et re quidem vera, in hac vita accipit mens nostra cognitiones suas a rebus sensibilibus per abstractionis viam, habetque per prius generalem et confusam notionem boni et beatitudinis in communi, praescindentem ab omni determinatione entis realis in quo ratio ista sit reponenda; insuper, cum apprehendit bona concreta in quibus pro suo arbitrio finem sibi praestituat, non uno eodemque actu intelligit finem et ea quae sunt ad finem, sed seorsum utrumque considerat. Cum autem voluntas sequatur intellectum, potest adhaerere alicui determinato medio, tanquam medio, (id est, non ut summo diligibili), quin appetat *aliquid determinatum* ut finem ultimum sibi praestitutum, sed solum *finem in communi, sive bonum in genere*. Quocirca, sicut homo in statu peccati mortalis manens, potest coniungere habitualement conversionem ad finem pravum cum quibusdam actibus bonis, qui nondum includunt conversionem ad Deum ut ad finem cui super omnia adhaereat: ita ex adverso, homo existens in statu gratiae, potest coniungere habitualement conversionem ad Deum cum actibus venialiter malis, qui etsi ad Deum irreferibiles, non ideo referuntur ad creaturam ut ad ultimum finem Deo oppositum. — Et per

hoc patet solutio rationis inductae, quae quidem valeret pro angelo vel anima separata, ut in corollario mox dicitur, sed nullam vim habet quoad hominem in praesenti statu, quia eius voluntas non semper fertur in media secundum quod stant sub ordine *determinati* finis. Unde nihil prohibet quominus, conservato ordine ad unum finem ultimum determinatum, velit aliquid quod sit praeter ordinem huius finis, *in vi solius appetitus boni in genere*.

Manet igitur peccati venialis ratio ab Angelico tradita: «Secundum habitum, inquit (1), avertitur a fine incommutabili, qui sibi alium finem contrarium ponit, et hoc est in peccato mortali; unde qui peccat mortaliter, est sicut recedens a via. In actu vero tantum aliquis avertitur, quando aliquis actum aliquem facit quo in Deum non tendit, ex eo quod inordinate ei quod est ad finem inhaeret, non tamen ita ut illud quod est ad finem quasi finem constituat, et hoc est in peccato veniali; unde peccans venialiter similatur ei qui nimis moratur in via, et hoc non est averti nisi secundum quid; sicut etiam quod retardat motum corporis gravis, non aufert gravitatem et inclinationem in finem; auferret autem si contrarium sibi motum daret, ut quando ex gravi leve generatur». — Hinc, peccatum veniale, ex parte substantiae actus definiri potest: *Dictum vel factum vel concupitum praeter legem aeternam* (2); ex parte vero privationis seu defectus: *Moralis deordinatio consistens, vel in indeliberata conversione ad quodlibet obiectum per legem aeternam prohibitum, vel in deliberata inhaesione ad medium quod finem Deo oppositum non inducit, et tamen ad Deum non est referibile*. Sicut autem in mortali, ita in veniali, aliquid consideratur ut materiale, et ali-

(1) S. Thom., in II., D. 42, q. 1, a. 3, ad 5^{um}.

(2) Iterum animadvertit peccatum veniale dici *praeter* legem Dei, quatenus est praeter, non contra finem ultimum quem respicit lex, atque ideo, praeter, non contra id quod primario ac principaliter in regula legis continetur. Ad rem Caietanus, in 1-2, q. 88, a. 1: «Venialia quidem ex imperfectione actus, sunt secundum quid, id est secundum imperfectum motum contra legem Dei, ut primus motus infidelitatis et adulterii tentantur. Venialia autem ex genere sunt secundum quid, id est secundum imperfectam materiam, contra legem Dei, ut mendacium iocosum et risus superfluius testantur».

quid ut formale; materiale est conversio ad obiectum extra ordinem finis existens; formale est conversio eadem, prout privat motum in finem et repugnat fervori charitatis.

COROLLARIUM

(ART. 3-4).

In angelo peccatum veniale omnino esse non potest; sed nec potuit esse in homine, quamdiu per gratuitum originalis iustitiae donum, inferiora sub superioribus infallibili ordine continebantur.

Haec conclusio, si modo de substantiis separatis et de originalis iustitiae statu recte sentiamus, ultro sequitur ex praemissis, sed et multum confert ad hoc ut natura venialis peccati penitus inspiciatur; ideo, maioris claritatis gratia, distincte est exponenda, primo quoad angelum, deinde vero quoad hominem in statu innocentiae.

§ 1.

« In angelo bono vel malo, inquit Angelicus (1), peccatum veniale esse non potest. Ratio est quia angelus non habet intellectum discursivum, sicut nos habemus; hoc autem pertinet ad rationem intellectus discursivi, ut principia seorsum interdum consideret, et conclusiones seorsum, et sic contingit quod ab uno in alterum discurrat, nunc hoc, nunc illud considerans; hoc autem in intellectu deiformi non discursivo esse non potest, sed semper conclusiones considerat in ipsis principiis absque omni discursu. Dictum est autem quod sic se habet finis ad ea quae sunt ad finem in appetibilibus et operativis, sicut se habet principium in demonstrabile ad conclusiones in demonstrativis; unde in nobis contingit quandoque, quod cogitamus vel afficimur circa ea quae sunt ad finem tantum, et quandoque solum circa finem, quod in angelis esse non potest, sed semper motus mentis angelicae simul fertur in finem et in ea quae sunt ad finem;

(1) De malo, quaest. 7, a. 9, in corp.

« unde nunquam in eis potest esse deordinatio circa ea quae sunt ad finem, nisi simul existente deordinatione circa finem ipsum. In nobis autem contingit esse deordinationem circa ea quae sunt ad finem per peccatum veniale, mente hominis habitualiter existente fixa in fine; et idcirco in hominibus contingit esse peccatum veniale sine mortali, non autem in angelis, sed omnis inordinatio est in eis per aversionem a fine ultimo, quod facit peccatum mortale. Ex hoc enim angelus peccat, quod inhaeret alicui bono creato, avertendo se a bono increato ». Hactenus doctrina S. Thomae; ad cuius meliorem intelligentiam, suppone hominem qui mendacium officiosum ordinaret ad finem adulterii; talis profecto peccaret mortaliter, et non venialiter tantum, quia etsi mendacium ex genere suo in venialibus debeat recenseri, ex quo tamen refertur ad finem mortalis peccati, sine dubio mortale efficitur. Proinde, mendacium officiosum apud nos, ideo veniale peccatum plerumque est, quia potest homo mentiri quin ordinet mendacium suum ad malum ultimum finem, multoque minus ei ut fini inhaereat; sed hoc non potest homo, nisi propter modum abstractivum et discursivum suae cognitionis, sicut paulo supra ostensum est in responsione ad 3^{um}. Nunc igitur cum talis modus in angelo non sit, fit ut voluntas eius nunquam feratur in ea quae sunt ad finem, nisi secundum quod stant sub ordine *determinati* cuiusdam finis ultimi, qui vel Deus est, vel creatura: « Propter hoc, ex natura sua habent (angeli), quod non possit in eis esse deordinatio..., nisi simul sit circa finem ipsum. Sed angeli boni non moventur in ea quae sunt ad finem, nisi in ordine ad finem debitum, qui est Deus, et propter hoc omnes eorum actus sunt actus charitatis, et sic in eis non potest esse peccatum veniale. Angeli vero mali in nihil moventur nisi in ordine ad finem peccati superbiae ipsorum, et ideo in omnibus peccant mortaliter, quaecumque propria voluntate agunt (1) ».

(1) S. Thom., hic, q. 89, a. 4, in corp. — Ea autem quae de angelo dicuntur, propter paritatem rationis dici etiam debent de animabus separatis, et de homine integro, postquam corruptibile hoc induerit incorruptionem. Quo fit ut animae sanctae in charitate decedentes, non sint amplius capaces ullius actus etiam venialiter mali, animae vero damnatae, in malo

Haec si bene consideres, videbis sensum huius doctrinae minime assecutos eos fuisse, qui conclusionem S. Thomae impugnant, quasi ipse doceret materiam venialem in homine evadere mortalem in angelo, aut naturam peccati immutari secundum solam diversitatem subiectorum: quae omnia facile falsa demonstrantur. Sed docet Angelicus, duo ad veniale peccatum requiri (1): primo, ut voluntas tendat in aliquid quod est de se *praeter* ordinem finis legis aeternae; secundo, ut illud non ordinet ad finem contrarium, quia alias, sicut constat ex terminis, *contra* finem ipso facto evaderet. In quocumque ergo operante hae conditiones verificantur, non mortale, sed veniale peccatum est. Nunc autem in angelo postrema conditio verificari nequit, quia angelus non potest aliquid velle sicut nos, ex appetitu boni *in abstracto*, sed quicquid vult infra finem, vult propter aliquem ultimum finem *in concreto*; et ideo, si quid appetat quod ad Deum referibile non sit, illud appetit propter finem contrarium Deo, ac per hoc, vel agit ex charitate, vel mortaliter peccat.

§ 2.

Ex dictis hactenus, satis superque apparet quod *prima radix* unde in nobis provenit possibilitas venialiter peccandi, consistit in modo intelligendi qui huius vitae proprius est. Sed nunc, ulterius considerandum venit quod *radix proxima* invenitur in insubordinatione partis inferioris ad superiorem; qui defectus, etsi naturaliter consequatur praesentem modum unionis animae cum corpore, potuit tamen impediri, et de facto fuit aliquando per donum gratuitum impeditus. — Et re quidem vera, si sub ratione superiori omnes nostrae potentiae et vires infallibili lege continerentur, nusquam posset homo operari praeter ordinem illius finis in quo eius mens habitua-

obstinatae, ullius affectus moraliter boni: ad finem enim in quo immobiliter figuntur, necessario cuncta referunt, non valentes amplius operari *praeter* finem illum. Propterea in purgatorio est pulchritudo pacis, in inferno autem nullus ordo, sed sempiternus horror inhabitat.

(1) In his semper agitur de veniali quod tale est ex obiecto, non autem ex imperfectione actus; quod enim in angelo non possit esse actus semi-deliberatus, nimis evidens est quam ut demonstratione indigeat.

liter fixa existit; nusquam enim ratio inferior quae occupatur circa media, subtraheret se ab imperio superioris quae inhaeret ultimo fini; unde, in sensu composito habitualis conversionis ad Deum, omnes hominis actus essent necessario ad Deum relati, nec relinqueretur locus *illogicitati practicae*, (si liceat dicere), qua quis uni summo ac supremo fini affectu coniungitur, et tamen multa facit quae sub ordine huius finis non stant. — Quia igitur in statu innocentiae originalis, cunctae hominis vires perfecte rationi subdebantur, veniale peccatum tunc possibile omnino non fuit: quamdiu scilicet permansit ille status, hoc est, antequam per peccatum mortale ratio superior sese a Deo averteret.

« Communiter ponitur, inquit Angelicus (1), quod homo
« in statu innocentiae non potuit venialiter peccare. Hoc autem
« non est sic intelligendum, quasi id quod nobis est veniale,
« si ipse committeret, esset sibi mortale propter altitudinem
« sui status. Dignitas enim personae est quaedam circumstantia
« aggravans peccatum, non tamen transfert in aliam speciem,
« nisi forte superveniente deformitate inobedientiae, vel voti,
« vel alicuius huiusmodi, quod in proposito dici non potest.
« Unde id quod est de se veniale, non potuit transferri in
« mortale propter dignitatem primi status. Sic ergo intelligen-
« dum est quod non potuit peccare venialiter, quia non potuit
« esse ut committeret aliquid quod esset de se peccatum ve-
« niale, antequam integritatem primi status amitteret, peccando
« mortaliter. Cuius ratio est, quia peccatum veniale in nobis
« contingit, vel propter imperfectionem actus, sicut subiti mo-
« tus in genere peccatorum mortalium, vel propter inordina-
« tionem existentem circa ea quae sunt ad finem, servato de-
« bito ordine ad finem. Utrumque autem horum contingit
« propter quemdam defectum ordinis, ex eo quod inferius non
« continetur firmiter sub superiori. Quod enim in nobis in-
« surgat subitus motus sensualitatis, contingit ex hoc quod
« sensualitas non est omnino subdita rationi; quod vero in-
« surgat subitus motus in ratione ipsa, provenit in nobis ex
« hoc quod ipsa executio actus rationis non subditur delibe-

(1) S. Thom., hic, q. 89, art. 3, in corp.

« rationi, quae est ex altiori bono. Quod vero humanus ani-
 « mus inordinetur circa ea quae sunt ad finem, servato debito
 « ordine ad finem; provenit ex hoc quod ea quae sunt ad
 « finem, non ordinantur infallibiliter sub fine, qui tenet sum-
 « mum locum, quasi principium in appetibilibus. In statu au-
 « tem innocentiae erat infallibilis ordinis firmitas, ut semper
 « inferius contineretur sub superiori, quamdiu summum ho-
 « minis contineretur sub Deo; et ideo oportebat quod inor-
 « dinatio in homine non esset, nisi inciperet ab hoc quod
 « summum hominis non subderetur Deo, quod fit per pecca-
 « tum mortale. Ex quo patet quod homo in statu innocen-
 « tia non potuit peccare venialiter, antequam peccaret mor-
 « taliter » (1).

Hinc consequitur, B. Virginem nullius unquam venialis
 noxae ream exstitisse, ut catholica tenet sententia. Ipsa enim
 in sua conceptione accepit donum originalis iustitiae, quantum
 ad omnia quae animae perfectionem spectant; et in hoc Adae in-
 nocenti comparatur. Nunc autem, ne peccaret mortaliter, supra
 Adam habuit confirmationem in gratia, per ea Spiritus Sancti
 adiutoria sub quibus praevidebatur semper inhaesura Deo ut
 fini ultimo. Ergo, tota pulchra fuit, in omnibus immaculata.

(1) Hanc rationem quae est ex natura rei, recentiores theologi post
 Suarezium non recipiunt, sed dicunt quod venialia a statu innocentiae ab-
 fuissent propter specialem Dei providentiam, quae a peccato veniali hominem
 avertisset. Nituntur autem hoc argumento: *Qui potest plus, potest et minus;*
atqui homo in statu innocentiae potuit plus, id est, peccare mortaliter; ergo
potuit et minus, id est, peccare venialiter. Verum, argumentum in aequivoco
 laborat. Transmissa enim maiore, negabis suppositum minoris; nam, cum
 de peccato agatur quod integritati primi status coexistat, vel comparatio
 inter veniale et mortale peccatum omnino extra quaestionem versatur, vel
 supponitur in minore, hominem potuisse componere mortalem culpam simul
 cum iustitia originali, quod profecto falsum atque contradictorium est. —
 Dicendum igitur, et melius, quod homo innocens, sicut potuit peccare mor-
 taliter, sed amittendo *ipso facto* originalem iustitiam, ita potuit peccare
 et venialiter, sed amittendo *per prius* hanc eandem originalem integritatem.
 Unde in sensu composito status innocentiae nullum peccatum esse potuit,
 nec mortale, nec veniale; fuit tamen in potestate hominis ut hunc statum
 destrueret per mortalem culpam, qua semel admissa, ablatoque ordine quo
 sub ratione superiori cuncta continebantur, incepit etiam venialis peccati
 capax exsistere.

THESIS X.

(QUAEST. 89, a. 1 — De malo, QUAEST. 7, a. 11).

**Peccatum veniale habituale est ipse peccati actus, prout
 imputabiliter permanens denominat hominem reum cuiusdam
 deviationis, extra et praeter ordinem veri ultimi finis. Con-
 iunctum cum mortali participat eius irreparabilitatem, et per
 accidens habet in inferno poenam aeternam; in iusto autem
 est simpliciter et absolute ab intrinseco reparabile, poena
 expiandum temporali tantum.**

§ I.

Quoad *peccatum veniale habituale*, proportionaliter appli-
 canda sunt principia de mortali peccato superius tradita (1).
 Sed duplex attendi debet differentia quantum ad id in quo
 habitualis culpae ratio salvatur.

Prima differentia est quod reatus culpae mortalis privat
 sanctificantem gratiam, qua sola homo habitualiter convertitur
 ad Deum finem supernaturalem. Hoc autem in venialibus non
 est, quia veniale peccatum non excludit nec diminuit habitum
 charitatis aliarumve infusarum virtutum, et non causat, proprie
 loquendo, maculam in anima (2). Quapropter, cum veniale
 dicitur contrariari fervori charitatis, sicut mortale contrariatur
 substantiae ipsiusmet, sensus non est quod culpa venialis ha-

(1) Vide supra, Thes. 4, pag. 62.

(2) « Macula importat detrimentum nitoris ex aliquo contactu, sicut in
 « corporalibus patet, ex quibus per similitudinem nomen maculae ad animam
 « transfertur. Sicut autem in corpore est duplex nitor, unus quidem ex in-
 « trinseca dispositione membrorum et coloris, alius autem ex exteriori cla-
 « ritate superveniente: ita etiam in anima est duplex nitor, unus quidem
 « habitualis, quasi intrinsecus, alius autem actualis, quasi exterior fulgor.
 « Peccatum autem veniale impedit quidem nitorem actualem, non tamen
 « habitualem, quia non excludit neque diminuit habitum charitatis et aliarum
 « virtutum. Macula autem importat aliquid manens in re maculata; unde
 « magis videtur pertinere ad detrimentum habitualis nitoris quam actualis.
 « Unde, *proprie loquendo*, peccatum veniale non causat maculam in anima.
 « Et si alicubi dicatur maculam inducere, hoc est secundum quid, in quan-
 « tum impedit nitorem qui est ex actibus virtutum. » S. Thom., hic, q. 89, a. 1.

bitualis consistat in aliqua privatione fervoris, quae sit cogitanda ad modum privationis habitus in mortali. Sed sensus est quod inordinatio, cuius venialiter peccans reus efficitur, opponitur tantum perfectae dominationi charitatis in homine, pro quanto fervidae charitatis est nihil permittere in conversatione nostra, quod non referatur ad Deum super omnia amabiliter dilectum. Caeterum, charitatis fervor aliquid actuale est, in cuius defectu physice considerato habituale peccatum reponi omnino nequit. — Nec obstat quod S. Thomas passim dicat, venialia haud aliter quam per fervorem charitatis remitti; per hoc enim non intendit quod ipse fervor sit causa formalis remissionis, sicut in mortalibus infusio gratiae; sed vult quod imputatio sive reitas venialis culpa non auferatur ex opere operantis, nisi mediante actu qui compenset perversionem ordinis per venialem actum inductam. « Aliter ergo, inquit de « Malo, Quaest. 7, a. 11 in corp., remittitur peccatum veniale, et aliter mortale. Nam quantum ad culpam, ad hoc « quod peccatum mortale non imputetur, oportet: quod tollatur « impedimentum quod erat ex corruptione principii, per novam « charitatis et gratiae infusionem. Hoc autem non requiritur « in peccato veniali, quia charitas manebat; sed oportet quod « tollatur impedimentum per aliquem fortem impulsus, repugnantem impedimento quod erat appositum ex obice veniali. « Sicut impedimentum quod contingit ex gravi corruptione, « non potest tolli nisi per iteratam eiusdem generationem; impedimentum vero quod esset ex aliquo obice appposito, tollitur « per aliquem violentum motum removementem ipsum obicem. « Sic ergo et veniale quantum ad culpam, remittitur per fervorem charitatis, mortale vero per gratiae infusionem ». Ubi vides quod in exemplo proposito, violentus motus non se habet ut causa formalis remotionis obicis, sed magis ut causa efficiens; at contra, impedimentum quod in ipsius gravitatis corruptione consistebat, per iteratam eiusdem generationem formaliter auferitur. — Et haec quidem maxime notata velim, quoad primam differentiam inter habitualement venialem culpam, et mortalem.

Sed et alia differentia sequitur ex prima. Dum enim remissio mortalis culpa in duobus consistit, tum scilicet in hoc quod Deus condonat offensam, non amplius imputando illam,

tum in hoc quod tollit aversionem, infundendo gratiam: remissio culpa venialis reponitur tantum in uno, id est in ablatione reitatis, quamvis ad eam essentialiter requiratur praesentia gratiae in anima, sicut ex iam dicendis evidentius apparebit.

§ 2.

Quod enim peccatum veniale coniunctum cum mortali, participet eius irreparabilitatem (1), facile constat ex causa irreparabilitatis superius assignata. Nam mortale peccatum in tantum est per se irreparabile, in quantum tollit ipsum principium ordinis quo voluntas hominis subditur Deo ut fini ultimo. Sed impossibile est reparari id quod est post principium, antequam reparetur principium ipsum; et repugnat ut sanetur defectus per se oppositus fervori charitatis, nondum reparata charitate quoad sui substantiam. Quare, si quis in statu aversionis a fine ultimo existat, praecedens vel superveniens venialis noxae reatus, profecto auferibilis non est, nisi praesupposita reparatione principii quod est gratia habitualis; quo fit ut, adventante termino viae, maneat in perpetuum, interminabili poena puniendus, nam: « Aeternitas poenae, ut dictum « est, concomitatur carentiam gratiae, ex qua provenit aeternitas culpa. Et inde est quod peccatum veniale in eo qui « decedit cum mortali, quia nunquam remittitur, aeterna poena « punitur propter gratiae carentiam » (2).

Hanc conclusionem communius recipiunt theologi (3), negat tamen Scotus cum sua schola; et ratio controversiae altius est repetenda. Quisquis enim intelligit quod in foro Dei taxantur poenae eodem omnino modo ac in foro iustitiae humanae, ita scilicet ut nihil aliud consideretur nisi transiens actus culpa, praeciso omni respectu ad perversionem interioris ordinis quam post se relinquit: iste necessario debet

(1) Vide supra, Thes. 7, pag. 79, seq.

(2) S. Thom., de Malo, q. 5, a. 2, ad 8^{um}. Et idem docet in 1-2, q. 87, a. 5, ad 3^{um}. — In II, D. 33, q. 2, a. 1, ad 2^{um}. — In IV, D. 21, q. 1, a. 2, q. 3, etc.

(3) Cf. Gregorium de Valentia, Disp. 6, q. 17, Punct. 4.

Scoto consentire. Sic enim poena, tam quoad durationem quam quoad acerbiteriam, haberet mensuram a sola gravitate transeuntis actus, et veniale peccatum, quamvis in aeternum manens secundum culpae reatum, temporaliter tantum in inferno puniretur. Quanquam nescio quomodo in his principiis recte adhuc explicari possent ea quae de peccato mortali omnes pariter confitemur. Scimus enim, peccato mortali reddi poenam aeternam, tum damni, tum sensus; scimus etiam, poenam damni esse propter aversionem a Deo, et poenam sensus propter conversionem ad commutabile bonum, iuxta illud Scripturae: *Quantum in deliciis fuit, tantum date illi tormentum*. Nunc autem, etsi in gravitate aversionis a Deo sit quaedam infinitas, cui adhuc responderet poena duratione infinita, non tamen in gravitate conversionis ad bonum creatum, si secundum se consideretur. Sequeretur ergo solam poenam damni debere esse sine fine, contra verbum Domini dicentis: *Ite in ignem aeternum*. — Quanto igitur melius dices cum S. Thoma, quod in foro Dei, duratio poenae non potest esse minor duratione perversionis ordinis moralis, quam peccati actus induxit. Hoc enim vel maxime interest inter iudicem Deum et iudicem hominem, quod iudex homo curam habet ordinis particularis et mere exterioris; ideoque, dum iudicat de actibus prout laedunt exteriorem ordinem communitatis, debet sistere in solo actu transeunte cum suis exterioribus consequentiis, minime attendendo ad perversionem ordinis interioris, qui forte manet vel non manet intus in corde. Sed Deus universalis ordinis iustitiae princeps est, et propter hoc, in foro eius eadem norma eademque mensura non tenet. — Sciendum itaque, quod quisquis peccat, meretur in aeternum puniri, si perversitas ordinis per actum peccaminosum inducta, in aeternum manet. Nunc autem, quia peccatum mortale habet ex natura sua, et quantum est ex parte peccantis, ut irreparabiliter pervertat interiorem ordinem, ideo *per se* inducit aeternae poenae reatum. Quia vero peccatum veniale ratione sui id non habet, ideo *per se* inducit poenam temporalem. Tandem, quia veniale coniunctum cum mortali, in sensu composito huius coniunctionis reparabile non est, ideo *per accidens*, seu ratione irreparabilitatis quam ab alio participat, punitur in gehenna poena nusquam finienda.

In iustis autem veniale non invenitur nisi secundum ea quae sibi conveniunt *per se*, et est reparabile per principium interius charitatis quod remansit. Non tamen statim ac culpa tollitur, necessario etiam consumitur totus poenae reatus, quia pro materiali culpae remanere potest debitum cuiusdam restitutionis in igne purgatorio; imo sic necesse est accidere, quoties iustus decedit cum venialibus ante mortem non retractatis: « Oportet dicere, inquit Angelicus de Malo, Quaest. 7, « a. 11, quod venialia remittuntur eis post hanc vitam, etiam « quantum ad culpam, eo modo quo remittuntur in hac vita, « scilicet per actum charitatis in Deum, repugnantem venialibus in hac vita commissis. Quia tamen post hanc vitam « non est status merendi, ille dilectionis modus in eis tollit « quidem impedimentum venialis culpae, non tamen meretur « absolutionem vel diminutionem poenae, sicut in hac vita ». Sed de his opportunior disserendi locus erit in tractatu de Poenitentia.

EPILOGUS

Ecce qui elongant se a te peribunt, perdidisti omnes qui fornicantur abs te; mihi autem adhaerere Deo bonum est (1). Haec sit conclusio huius nostrae disquisitionis; nam ibi describitur peccatum, quantum ad deordinationem, quantum ad substantiam actus, quantum ad irreparabilem miseriam quam inducit, et e regione ponitur illud in quo absoluta hominis felicitas sive beatitudo consistit.

Deordinatio peccati mortalis designatur, cum dicitur: *Qui elongant se a te*, siquidem, ut ex praemissis constat, moralis perversitatis ratio in nullo alio esse vel concipi potest, praeterquam in deviatione a Deo, vero fine ultimo humanae vitae. Est enim Deus, ipseque solus, totius moralitatis principium et terminus, ita ut tam repugnet concipere bonum vel malum morale, non intellecta convenientia vel disconvenientia cum lege Dei ad seipsum omnia necessario dirigentis, quam repugnat concipere hominem, nondum intellecta rationalitate. Quod si quandoque de bono vel malo morali loquimur secundum convenientiam vel disconvenientiam ad naturam rationalem, hoc ideo est, quia ipsam rationalem naturam apprehendimus prout ipsa, sub ordine veri ultimi finis constituta, se tota involvit dependentiam ab eodem fine, necnon et a lege ipsum respiciente. Sed si talis fieret abstractio, per quam totaliter et absolute removeretur divinae legis et proprii eius finis conceptus, nihil iam ex omnibus ad quae libido humana se extendit, apparere posset ut terminus deordinationis voluntariae, quia tunc liberum arbitrium inveniretur in apice et fastigio ordinis, sibi que ipsi regula foret, ac pro tanto, a rectitudine sui actus declinare amplius non valeret.

(1) Psalm. LXXII, 27.

Vere igitur tota actus moralis malitia in elongatione seu aversione a Deo reponi dicenda est. Ast impossibile sane est ut homo moraliter agens omni modo se subtrahat ab appetitu ultimi finis, sed semper oportet ut de ordine moralitatis remaneat motus in bonum, quin possit unquam voluntas ipsam rationem mali in seipsa intendere; et hac de causa, explicans Propheta modum quo anima voluntarie a Deo elongatur, addit: *Perdidisti omnes qui fornicantur abs te*. Designat enim fornicatio ista substantiam actus peccati, qua homo contra debitum convertitur ad commutabile bonum, ac per hoc ipsum deviat a vero fine. « Si enim mens hominis delectetur in spiritali coniunctione ad id cui debet coniungi, scilicet ad Deum, et abstineat se ne delectabiliter aliis coniungatur contra debitum divini ordinis, dicitur castitas spiritalis, secundum illud 2 Cor. XI, 2: *Despondi enim vos uni viro virginem castam exhibere Christo*. Si autem delectabiliter contra debitum divini ordinis coniungatur mens quibuscumque aliis rebus, dicitur fornicatio spiritalis, secundum illud Ierem. III, 1: *Tu autem fornicata es cum amatoribus multis* » (1).

Sed fornicatio ista ducit ad interitum et perditionem absque remedio, et ideo dicit: *Ommes qui elongant se a te peribunt, perdidisti omnes qui fornicantur abs te*. Quomodo peribunt, et quando perdentur? Cum non dabitur amplius locus poenitentiae, qua voluntas aberrans sese rectificat circa ultimum finem, quod erit in termino viae. Et hinc necesse erit consequi extremam miseriam hominum qui a prima Bonitate immobiliter aversi, et a vera vita perpetuo exclusi, semper diligent ea pro quibus punientur, et summo odio habebunt poenas quae pro huiusmodi infligentur. Haec est mors aeterna, hic remorsus pertingens usque ad divisionem animae et spiritus, qui in Scripturis metaphorice vermis nominatur, secundum illud Isai. LXVI, 24: *Veniet omnis caro ut adoret coram facie mea, dicit Dominus. Et egredientur et videbunt cadavera virorum qui praevaricati sunt in me; vermis eorum non morietur et ignis eorum non exstinguetur, et erunt usque ad satietatem visionis omni carni*.

(1) S. Thom., 2-2, Quaest. 151, a. 2.

E regione vero ponitur in prophetia illud in quo absoluta hominis felicitas consistit: *Mihi autem, inquit, adhaerere Deo bonum est*. Et ideo certe bonum adhaerere Deo, quia ipse solus est Bonum per essentiam, a quo omnia, per quem omnia, in quo et ad quem omnia. Ipse cuius voluntas, suprema et imparticipata regula honestatis est; a cuius etiam ordine nemo vel leviter absque iactura rectitudinis se subtrahere potest; unde et scriptum est: *Doce me facere voluntatem tuam, quia Deus meus es tu; spiritus tuus bonus deducet me in terram rectam* (1). Ipse demum altissimum obiectum circa quod in futura vita, perfectissima erit operatio, eaque annexam habens ut connaturalem proprietatem delectationem purissimam, in qua nimirum nihil miscebitur quod a delectatione alienum sit, nihil turpitudinis, nihil anxietatis, nihil defatigationis. Et ratio est quia « delectatio perficit operationem sicut pulchritudo « iuventutem; est enim quidam decor operationis ipsa delectatio... Ipsa autem operatio perfecta, beatitudo est; obiectum autem altissimum, Deus est; delectatio autem purissima est spiritalis delectatio, ut in decimo Ethicorum « probatur. Et ideo in littera dicitur quod Deus rectorum « voluntatum finis est, et charitas, et bona delectatio, et beatitudo: ita tamen quod Deus ultimus finis sit, et beatitudo « charitatem et delectationem complectens, sit sicut finis sub « fine, coniungens ultimo fini » (2).

Quae igitur cum ita sint, manifestissime apparet, unum esse verum et summum hominis malum quod est peccatum, et post peccatum commissum, unum remedium quod est poenitentia, antequam veniat dies immobilitatis nostrae, in qua, *si ceciderit lignum ad austrum aut ad aquilonem, in quocumque loco ceciderit, ibi erit*.

(1) Psalm. CXLII, 10.

(2) S. Thom., in II, D. 38, q. 1, a. 2.

INDEX

PROOEMIUM pag. 3-10

PARS PRIOR

DE PECCATO MORTALI

CAPUT PRIMUM

De actu peccati.

QUAEST. 71. — De ratione seu definitione eius	11
<i>Quod in moralibus bonum et malum contrarie opponuntur</i>	12-15
<i>Quod ad rationem peccati duo concurrunt: substantia actus, et defectus rectitudinis</i>	15-18
<i>Quod privatio debitae rectitudinis actui morali inest, in quantum caret commensuratione ad regulam legis aeternae, per dictamen conscien- tiae voluntati applicatam</i>	19-23
<i>Quod malum morale nec esse nec concipi ullo modo potest, abstractione facta a lege Dei et sine quem respicit lex divina, et quod pec- cati philosophici notio est metaphysice re- pugnans</i>	23-30
<i>Quod lex Dei quaedam prohibet intentione pri- maria, quaedam vero intentione secundaria tantum; et quod ideo, quidam actus dicuntur mali in quantum sunt contra legem, alii vero in quantum sunt praeter</i>	30-35

- THESIS I. — Peccatum mortale, ex parte substantiae actus convenienter definitur: dictum vel factum vel concupitum contra legem aeternam. Ex parte vero defectus seu privationis: aversio a Deo sine ultimo per voluntariam conversionem ad bonum commutabile pag. 35-37
- COROLLARIUM — *Ergo in malitia mortalis peccati aliquid considerari debet ut materiale, et aliquid ut formale; ut materiale quidem, quatenus homo se convertit ad id quod est extra ordinem finis, indebito modo fruens creatura; ut formale vero, quatenus ita ad creaturam convertitur, ut a Deo sese avertat in commutabili bono suum ultimum finem constituens.* 39-40
- QUAEST. 72-73 — De distinctione peccatorum
- THESIS II. — Peccata specie distinguuntur ex parte actus voluntarii, potius quam ex parte inordinationis in peccato existentis, secundum obiecta moraliter mala ad quae peccans convertitur. 41-50
- THESIS III. — Non omnia peccata mortalia sunt inter se paria, sed dantur alia aliis graviora, sive ex genere suo, sive ex circumstantiis intra eandem speciem aggravantibus, sive demum ex maiori intensione voluntatis . . . 51-56
- QUAEST. 74-84. — De subiecto et causis peccatorum 56-59

CAPUT SECUNDUM

De his quae actum peccati consequuntur.

- QUAEST. 85. — De corruptione boni naturae 39-61
- QUAEST. 86. — De reatu culpae et macula animae
- THESIS IV. — Peccatum habituale, formali quidem significatione dicit permanentem actus peccaminosi reitatem, qua constituitur homo in statu aversionis a Deo; significatione vero materiali, in praesenti ordine naturae elevatae, dicit privationem gratiae sanctificantis, prout dependentem ab actu qui praecessit, et imputabiliter adhuc in esse perseverat 62-68

- THESIS V. — Macula peccati est re idem cum culpa habituali, sed ratione differt, et ideo dupliciter potest peccatum auferri, vel per modum ablutionis maculae, ut fit in baptismo, vel per modum remissionis culpae, ut in Sacramento Poenitentiae pag. 68-69
- QUAEST. 87. — De reatu poenae
- De ratione poenae in generali.* 69-71
- De poena concomitante et poena inflicta.* . . . 71-73
- De poena quae infligitur in remedium salutis et ea quae est ex pura iustitia in vindictam violationis ordinis.* 73-74
- De poena inflicta futuri saeculi, prout in poenam damni et poenam sensus dividitur.* . . . 74-77
- THESIS VI. — Omne peccatum inducit reatum poenae proportionatae pro futura vita in foro Dei 78-79
- THESIS VII. — Omne et solum peccatum mortale per se inducit reatum poenae aeternae, quae etiam est duplex: poena quidem damni respondens inordinationi aversionis a vero ultimo fine, et poena sensus respondens inordinationi conversionis ad indebitum finem. Porro aeternae punitionis ultima ratio est aeterna permanentia moralis inordinationis in humana voluntate, quae post mortem, circa ultimum finem amplius flectibilis non est, sed in eo fine cui in instante mortis adhaerebat, immobiliter ac necessario ex rei natura obfirmatur 79-92
- COROLLARIUM. — *Licet in iustificatione impii remissio culpae necessario inferat remissionem reatus poenae aeternae, nihil tamen prohibet quin post iustificationem adhuc remaneat reatus poenae temporalis.* 93-96

PARS POSTERIOR

De peccato veniali

- QUAEST. 88-89 — Introductio. 99
- THESIS VIII. — Per lignum, fenum et stipulam, quae I Cor. III, 12, dicuntur iuxta poni fundamento spiritualis aedificii, intelligi debent

- peccata venialia: unde recte damnata est in Baio propositio asserens, nullum peccatum esse ex natura sua veniale, sed omnem culpam mereri poenam aeternam . . . pag. 99
- THESIS IX. — Peccatum veniale, si etymon vocis attendatur, nihil aliud est quam peccatum ex sese reparabile: si autem attendatur ultima ratio impositionis nominis, est actus moraliter malus qui non tollit principium ordinis per aversionem a Deo, et pro tanto, dici potius debet praeter, quam contra legem aeternam, sive sit venialis ex genere suo, sive ex imperfectione actus tantum . . . 103
- COROLLARIUM. — *In angelo peccatum veniale omnino esse non potest; sed nec potuit esse in homine, quamdiu per gratitum originalis iustitiae donum, inferiora sub superioribus infallibili ordine continebantur* . . . 116
- THESIS X. — Peccatum veniale habituale est ipse peccati actus, prout imputabiliter permanens denominat hominem reum cuiusdam deviationis, extra et praeter ordinem veri ultimi finis. Coniunctum cum mortali participat eius irreparabilitatem et per accidens habet in inferno poenam aeternam; in iusto autem est simpliciter et absolute ab intrinseco auferibile, poena expiandum temporali tantum . . . 117-121
- EPILOGUS . . . 123-125

Approbatio operis.

Cum opus cui titulus: *Disquisitio de natura et ratione peccati personalis, sive introductio ad tractatum de Poenitentia*, auctore Ludovico Billot S. I., aliqui eiusdem Societatis theologi recognoverint, et probaverint, facultatem concedimus ut typis edatur.

Romae, die 4 Novembris 1894.

EMMANUEL DE CARO S. I.
Praepositus Provinciae Romanae.

IMPRIMATUR

FR. RAPHAËL PIEROTTI O. P. S. P. A. Magister.

IMPRIMATUR

IULIUS LENTI Patriar. Constantinop. Vicesgerens.